

YONASI, KEBISA NTIMA NA NGE!

Mukanda ya Yonasi na baleso 9 sambu na bana

Muntu ya me sonika baleso yai Pasteur Mama Lorella Rouster, MCE

Leso 1. YONASI KE ZOLA TINA NZAMBI

BAVERSE YA LESO : Yonasi 1:1-4, Bankunga 139:7-10

KULONGA MIKANDA YA BIBLE:

Bible kele na bandambu zole: Kuwakana ya Ntama, ti Kuwakana ya Mpa. Kuwakana ya Ntama ke songa beto nde ‘Ngulusi ta Kwisa.’ Kuwakana ya Mpa ke songa beto nde ‘Ngulusi mene Kwisa.’ Mukanda ya Yonasi ya beto ta mona na bamposo yai, yo ikele na kati ya Kuwakana ya Ntama.

KIKUMA YA LESO: Beto zola bana kubakisa nde bo lenda bumbana ve na meso ya Nzambi, yo yina bo lemfuka na Yandi, bo bumba masumu na bo ve, kansi bo ndima mpi yambula yo.

KUYANTIKA LESO: Songa mpila bana ya fioti ke bumbana. Bo tula maboko na zulu ya meso na bo, ebuna bo banza nde muntu ya nkaka lenda mona bo ve. Sala mwa-theatre ya ke songa mpila bo ke sala yo. Bana ya fioti ke banza bo lenda bumbana. Bo bakisa ve sambu na inki bantu ya nkaka ke seka bo. Bo ke seka sambu bana yina, bo me bumbana ve ata fioti. Bantu kele kumona bo pwelele. Mutubi mosi ya Nzambi mpi zolaka kubumbana. Yandi zolaka kutina Nzambi. Mambu na yandi kele na mukanda ya Yonasi na Bible, ti zina na yandi vandaka mpi Yonasi.

MAMBU YA NENE YA LESO YAI:

1. Nzambi bingka Yonasi Yonasi 1:1-2

A. Tanga Yonasi 1:1-2 na malembe yonso

1 Mfumu Nzambi tubaka na Yonasi mwana ya Amitai nde:

2 “Nge Yonasi, kanga bima nge kwenda na Ninive, bwala yina ya nene-nene. Kwenda songa bantu ya bwala yina nde mbi na bo me kuma tii na meso na mono.”

B. Yula bana:

- Nzambi bingaka Yonasi kukwenda wapi? (na Ninive!) Longi, Tendula na bana Ninive vandaka inki mutindu:
 - Ville ya nene
 - Capitol ya Kimfumu ya Assyrie, ya yalaka bainsi mingi
 - Mbeni ya Bayuda (Yonasi vandaka Muyuda)
 - Bantu ya kwisaka na kunwanina Bayuda
 - Fuluka ya bantu ya mbi ya zolaka ve Nzambi
 - Fuluka ya bantu ya sambaka biteki ti bampive ya imbi
- Yonasi fweti songa bantu ya Ninive inki ndinga ya Nzambi me pesa yandi kusonga bo? (Mbi na bo me kuma na Nzambi, Yandi me mona yo.)

C. Kusonga inki me salama: Bana zole sala theatre kusonga mpila Nzambi bingaka Yonasi.

D. Yimba ti kina kusonga inki me salama: Yimba na ton ya "Yesu Azali Awa", to sala na ton ya nge mosi: "Yonasi, Kwenda na Ninive!"

2. Yonasi tinaka Nzambi Yonasi 1:3

A. Tanga Yonasi 1:3 na malembe yonso.

3 Yonasi kangaka bima, kansi yandi simbaka nzila na kwenda na bwala Tarsisi sambu na kutina Mfumu Nzambi. Yandi banzaka nde kuna Mfumu Nzambi ta mona yandi diaka ve. Yandi kwendaka na bwala Yafa; kuna yandi monaka maswa mosi ke zola kwenda na Tarsisi. Yandi sumbak tike, yandi kotaka na maswa sambu na kwenda nzila mosi ti bantu ya maswa.

B. Yula bana :

- Keti Yonasi lemfukaka na Nzambi kukwenda na Ninive ? (Ikele ve.)
- Yandi kwendaka na wapi ? (Na Tarsisi. Bwala yai kele na direction ya nkaka. Nzambi me tuba kwenda na diboko na kinkento, kansi Yonasi me kwenda na diboko ya kibakala, ntama ti Ninive.)
- Sambu na inki Yonasi zolaka kwenda na Tarsisi ? (Sambu na kutina Nzambi, sambu yandi monaka nde kuna Nzambi ta mona yandi diaka ve.)

C. Kusonga inki me salama :

Bana sala theatre ya mambu yai:

- Yonasi kangaka bima na yandi.
- Yandi kwendaka ntete na Yafa.
- (Bambuka nde Nzambi songaka yandi kukwenda na Ninive.)
- Na Yafe, yandi sumbaka tike.
- Yandi kotaka na maswa.
- Yandi zolaka kwenda na Tarsisi. (Tarsisi kele ntama ti Yafa, na ndambu ya Espagne, mpi na direction ya nkaka.)
- Yonasi zolaka kutina Nzambi! (Bana sala bonso bo ke bumbana.)

D. Yimba ti kina kusonga inki me salama: (Ton bonso 'Yesu Azali Awa') Yandi lemfukaka ve! (mbala 3) O Mawa!

3. Nzambi monaka Yonasi Yonasi 1:4

A. Tanga Yonasi 1:4 na malembe yonso.

4 Kansi Mfumu Nzambi tindaka mupepe ya ngolo sambu na kunikisa masa ; kitembo mosi ya nene kwisaka kubula na maswa, maswa zolaka kupasuka mpenza.

B. Kuyula bana :

- Nzambi tindaka inki kulanda Yonasi ? (Mupepe ya ngolo, kitembo mosi ya nene)
- Mupepe ti kitembo yina salaka inki ? (Yo nikisaka masa ti yo bulaka maswa sambu bo yindulaka yo fweti pasuka.)

C. Kusonga inki me salama: Na theatre, mwana sala bonso yandi kele Nzambi, ke mona Yonasi. Mpila ya kubumbana na meso ya Nzambi ikele ve! Na nima, bana yonso sala bonso bo kele mupepe ya ngolo, mpi bonso bo kele na kati ya maswa na kitembo ya nene.

D. Yimba ti kina kusonga inki me salama : Nkunga (ton bonso 'Yesu azali awa': Nzambi kele mona nge! (mbala 3) Ntangu yai!

Kumanisa Leso: Na mposo ke kwisa, beto ta mona inki Yonasi salaka na kati ya kintembo yina. Keti yandi fwaka? Beto ta songa yo na mposo ke kwisa.

VERSE YA KUTUBA: Tanga Bankunga 139:7-10 ya mvimba. Na nima, bana ta tuba verse 7:

*139 :7 Wapi mono lenda tina nge (Nzambi)
Wapi kisika mono lenda kwenda nde nge mona mono ve ?*

Kulonga Verse: Bana tuba yo mbala 6, mutindu yai:

Mbala ya ntete: Bo landa nge na kutuba bitini ya fioti.

Mbala ya zole: Bo landa nge na kukangisa bitini ya bandambu.

Mbala ya tatu: Yula nani kudiaka saka-saka mazono. Bo yonso telema ti tuba verse ya mvimba.

Mbala ya iya: Bo tuba yo ngolo sambu bwala ya nkaka lenda kuwa yo.

Mbala ya tanu: Bana tatu lenda meka kutuba yo bo mosi.

Mbala ya sambanu: Bana bumba luse na bo ti kanga meso ti tuba yo.

Nkunga: O masumu (O masumu) O masumu yambula!

MALONGI YA BAKRISTO:

Beto lenda bumbana ve na meso ya Nzambi. Yandi kele kumona beto konso ntangu. Yo yina, mbote bakristo yambula mambu yonso ya mbi ya bo kele kusweka. Mbote beto yantika kulemfuka na Nzambi. Yula kana bo ke na mambu bo me zola kubumbila Nzambi. Bo lenda ndima yo na lombilu, ebuna Nzambi ta pesa bo ngolo sambu bo lenda yambula mambu yina. Yimba diaka: Yesu kele mona nge (mbala 3) Ntangu yai!

KUBINGA NA YESU:

Kana nge me yamba Yesu ntete ve, nge mpi lenda bumba yo ve na meso ya Nzambi. Nzambi ke mona ntima na nge. Kana nge me yamba Yesu ntete ve, Yandi kele kutanga nge ve bonso mwana na Yandi. Mbote nge bika imbi na nge ti kwisa yamba Yesu bubu. Kana nge zola yamba Yesu kaka bubu, kwisa vanda na kiti yai (songa kiti mosi) na nima ya Ecodim. Mono ta kwisa kusadisa nge.

====

NSUKA YA LESO 1

====

Leso 2. NZAMBI LANDAKA YONASI

BAVERSE YA LESO : Yonasi 1:4-16, 2:1

KULONGA MIKANDA YA BIBLE: Tuba diaka bandambu zole ya Bible. Yonasi kele na ndambu ya ntete--Kuwakana ya Ntama.

KIKUMA YA LESO: Kuzaba nde, ata muntu zola tina Nzambi, Nzambi kele kusosa yandi kaka. Beto meka kutina Nzambi ve, kansi beto kudipesa na Yandi.

REVISIO:

Sambu na inki Nzambi zolaka Yonasi kukwenda na Ninive? (Sambu bantu kuna, bo balula ntima.) Yonasi fweti sala inki na Ninive? (Samuna bandinga ya Nzambi ta songa yandi.) Sambu na inki yandi zolaka kulemfuka ve? (Ninive vandaka mbeni ya Bayuda.) Yandi salaka inki ya songaka nde yandi vandaka kutina Nzambi? (Kwendaka na Tarsisi.)

VERSE YA KUTUBA: *Luka 19:10*

Sambu Mwana-muntu kwisaka kusosa ti kugulusa bantu yina me vilaka

KUYANTIKA LESO: Songa histoire ya ke songa muntu ya salaka mambu mosi ya vandaka mayele ve. Mbala mingi beto bantu ke sala mambu ya kele mayele ve. Yonasi mpi salaka mambu ya vandaka mayele ve. Yandi zolaka kutina Nzambi! Yimba diaka: Yandi tinaka Nzambi, O Mawa!

MAMBU YA NENE NA LESO YAI:

1. Nzambi tindaka mupepe ya ngolo.

A. Tanga Yonasi 1:4

Kansi Mfumu Nzambi tindaka mupepe ya ngolo sambu na kunikisa masa; kitembo mosi ya nene kwisaka kubula na maswa, maswa kolaka kupasuka mpenza.

B. Yula bana:

- Sambu na inki Nzambi tindaka mupepe ti kitembo? (Sambu Yonasi vandaka kutina Yandi.)

C. Songa inki me salama: Bana sala theatre. Bo yonso sala bonso mupepe ya nene, bo nikana, bonso mupepe ke nikisa bo.

D. Yimba ti kina kusonga inki me salama: Nzambi tindaka mupepe--ya ngolo! (Ton: 'Yesu Azali Awa')

2. Bantu ya maswa kuwaka boma.

A. Tanga: Yonasi 1:5-6.

5 Bantu ya maswa waka boma mingi; konso muntu yantikaka kusamba Nzambi na yandi. Sambu na kukatula ndambu ya kilo, bima yina vandaka na maswa bo yantikaka kulosa yo na masa. Kansi Yonasi vandaka me kulumuka na nsi ya kibeya ya maswa; kuna yandi lalaka mpongi ya ngolo.

6 Kapiteni ya maswa kwisaka kukuta Yonasi ko kuna. Yandi yulaka yandi nde: “Nki nge ke sala awa? Sambu na inki nge ke lala mutindu yai? Telama! Samba nzambi na nge. Mbala ya nkaka yandi ta wila beto mawa, beto ta fwa ve.”

B. Yula bana:

- Sambu na kitembo, bantu ya maswa salaka inki? (Losaka bima na masa ti sambaka banzambi na bo.)
- Yonasi kwendaka kusala inki? (Kulala mpongi.)
- Kapiteni ya maswa songaka Yonasi kusala inki? (Kusamb Nzambi na yandi, kana yandi ta wila bo mawa sambu bo kufwa ve.)

C. Songa inki me salama: Bana sala theatre ke songa mambu yai: Bo songa boma, bo samba (biteki na bo), losa bima na masa, mfumu na bo tedimisa Yonasi.

D. Yimba ti kina sambu na kusonga inke me salama: Boma simbaka bo ngolo! O boma!

3. Nzambi songaka masumu ya Yonasi.

A. Tanga: *Yonasi 1:7-10*

7 Ntangu yai bantu ya maswa yantikaka kutubana bo na bo nde: “Beno kwisa, beto buleno zeke sambu na kuzaba kana nani me natila beto mpasi yai.” Bo bulaka zeke, yo bwilaka Yonasi.

8 Ebuna bo tubilaka yandi nde: “Nge muntu me natila beto mpasi yai, songa beto nki ke sala awa. Nge me katuka wapi? Nki ntoto na nge? Nki ndinga na nge?”

9 Yonasi vutulaka nde: “Mono kele Mu-ebreo. Mono ke sambaka Mfumu Nzambi ya zulu, Nzambi yina salaka banzadi ti ntoto.”

10 Yandi zabisaka bo mpi nde yandi ke tina Mfumu Nzambi. Ebuna bantu ya maswa waka boma mingi mpenza. Bo yulaka yandi nde: “Sambu na nki nge me sala mambu ya mutindu yai?”

B. Yula bana:

- Bantu ya maswa salaka inki sambu na kuzaba nani me natila bo mpasi yina? (Bo bulaka zeke.)
- Yo bwilaka nani? (Yonasi)
- Bo yulaka Yonasi inki? (Nki ke sala awa? Nge me katuka wapi? Nki ntoto na nge? Nki ndinga na nge?)
- Yonasi tubaka nde yandi vandaka nani? (Mu-ebreo)
- Yonasi tubaka nde yandi vandaka kusamba nani? (Nzambi ya salaka nzadi ti ntoto)
- Bantu ya maswa waka inki ntangu yina? (Bo vandaka na boma mingi mpenza.)

C. Songa inki me salama: Bana sala theatre ke songa mpila bo bulaka zeke. Bo yonso songa Yonasi musapi.

D. Yimba ti kina kusonga inki me salama: Masumu ya Yonasi kumonikaka! Kumonikaka na bantu!

4. Bo losaka Yonasi na masa.

A. Tanga Yonasi 1:11-16

11 Mupepe vandaka kwisa ngolo mpenza. Yo yina bantu ya maswa yulaka Yonasi diaka nde: “Nki beto fweti sala nge sambu nzadi-mungwa yai kuvanda pima?”

12 Yonasi nde: “Beno baka mono, beno losa mono na nzadi-mungwa. Mpidina nzadi-mungwa ta vanda pima. Mono zaba mbote nde mupepe yai ya ngolo me kwisila beno sambu na mbi ya mono salaka.”

13 Bantu ya maswa lukaka bankai na bo ngolo sambu na kukuma na mukidi. Kansi bo vandaka kukuka ve sambu mupepe vandaka kunikisa masa ngolo mpenza.

14 Ebuna bo sambaka Mfumu Nzambi na ndinga ya ngolo nde: “Mfumu Nzambi, beto ke bondila nge, kumona beto mbi ve sambu na moyo ya muntu yai, bika beto kufwa ve sambu beto ke losa yandi na nzadi-mungwa. Sambu nge mosi Mfumu Nzambi, nge muntu me songa nki beto fweti sala.”

15 Ntangu yai bo baka Yonasi, bo losa yandi na nzadi-mungwa. Na mbala mosi masa kumaka pima.

16 Ebuna bantu ya maswa waka Mfumu Nzambi boma mingi ; bo zengaka nde bo fweti sambaka yandi, bo fwaka mpi mbisi sambu na kupesa Mfumu Nzambi makabu.

B. Yula bana:

- Inki bantu ya maswa yulaka Yonasi? (Bo fweti sala inki sambu masa kuvanda pima?)
- Yonasi songaka bo kusala inki ? (Kulosa yandi na masa.)
- Na nima bo losaka yandi na masa, inki salamaka ? (Mbala mosi masa kumaka pima.)
- Bantu ya maswa salaka inki ntangu yina ? (Bo waka Nzambi boma ti zengaka kusamba Yandi.)

C. Songa inki me salama: Bana sala theatre ke songa masa ke nikana kuluta ngolo--kuluta ngolo! Kuluta ngolo! Bo samba Nzambi, ebuna bo losa Yonasi na masa, ebuna mupepe kumana. Bo samba Nzambi diaka.

D. Yimba ti kina sambu na kusonga inki me salama: O, Yonasi ke dinda! Na Masa!

5. Mbisi minaka Yonasi.

A. Tanga: Yonasi 2 :1

1 Mfumu Nzambi tindaka mbisi ya nene ya masa, yo kwendaka kumina Yonasi. Yandi vandaka na kati ya divumu ya mbisi yina bilumbu tatu, mpimpa ti mwini.

B. Yula bana :

- Nzambi tindaka inki ? (Mbisi ya nene ya masa)
- Yo salaka inki ? (Yo minaka Yonasi.)
- Yonasi fwaka ve, kansi yandi salaka bilumbu ikwa na inki ya divumu ya mbisi yina? (Bilumbu tatu mpimpa ti mwini)

C. Songa inki me salama: Bana kangula maboko bonso yo kele munoko ya mbisi, bo kanga Yonasi. Bo mina yandi. Yonasi kufwaka ve, kansi yandi vandaka na moyo na kati ya

divumu ya mbisi.

D. Yimba ti kina kusonga inki me salama: Mbisi minaka Yonasi! O mawa!

MALONGI YA BAKRISTO: Na inki mambu nge me zola kutina Nzambi? Nge me zola kubumbila Yandi inki mambu na luzingu na nge? Yandi ke zaba yo dezia. Yandi kele kulanda nge kaka. Sesepiyai, tanga mambu yina na lombilu. Sosa pardo ya Nzambi. Lomba lusadisu na Yandi na mambu yina. (Kana bana me yela, bo lenda sonika inki mambu bo me zola kubumbila Nzambi.)

KUBINGA NA YESU: Kana nge me yamba Yesu ntete ve na ntima na nge, Nzambi mpi ke zaba yo. Nge lenda bumbila pasteur to bantu ya nkaka. Bo lenda banza nde nge kele mukristo. Kansi mpila kubumbila Nzambi ikele ve. Yandi ke zaba ntima na nge. Yandi ke zaba kana nge kele mukwikidi ya kieleka. Kana nge zola yamba Yesu bubuyai, kwisa vanda awa (songa kisika) na nima ya ecodim, sambu beto lenda sadisa nge.

====

NSUKA YA LESO 2

====

Leso 3. YONASI VUTUKAKA NA NZAMBI

BAVERSE YA LESO: Yonasi kapu 2

KULONGA MIKANDA YA BIBLE: Yula bana bandambu zole ya Bible. Yula bo mukanda ya Yonasi kele na inki ndambu. Yula bo inki mambu ya nene beto ke mona na Kuwakana ya Ntama. Yula bo na ntangu ya Yonasi, bantu zabaka nde ‘Mesia ta kwisa’ to “Mesia mene kwisa”? (Mesa ta kwisa.)

Kuwakana ya Ntama mpi kele na bandambu--bandambu iya. Ya ntete kele mikanda ya Moise sonikaka. Mikanda ya Moise ke songa mpi bansiku ya Nzambi. Ya zole kele mikanda ya histoire ya Bayuda. Ya tatu kele mikanda ya poesie. Mingi ya mikanda yina kele bankunga. Ya iya kele mikanda ya bamitubi ya Nzambi. Mukanda ya Yonasi ikele mosi na ndambu yai ya nsuka--mikanda ya bamitubi ya Nzambi. Yonasi mpi vandaka mutubi ya Nzambi.

KIKUMA YA LESO: Kuzaba nde beto bakristo mbala mingi ke vilaka nzila ya Nzambi, ke salaka masumu. Kana beno me zaba masumu na beto, beto lenda vutuka na Nzambi. Kana beto ndima ti yambula masumu, Yandi ta yamba beto. Mbote bakristo ya me bwa na masumu kuvutuka na Nzambi.

REVISIO: Beto mpi me mona mutubi mosi ya Nzambi ya vilaka nzila. Nzambi songaka yandi kukwenda wapi? (Ninive, sika bambeni ya bantu na yandi vandaka kuzinga). Kansi Yonasi kwendaka wapi? (Tarsisi, ya vandaka ntama ti sika ya Nzambi songaka yandi) Inki Nzambi tindaka sambu Yonasi lenda zaba nde yandi me vilaka nzila? (Ntembe ya ngolo na masa) Bantu na maswa monaka bonso bo ta fwa, ebuna na nsuka bo salaka inki ti Yonasi? (Bo losaka yandi na masa.)

KUYANTIKA LESO: Sala theatre na kusonga mama mosi ya vilaka nzila ya mfinda, ebuna yandi monaka mpasi mingi na nzila. Keti beno banza nde mama fweti vutuka na nzila? Songa yandi, "Mama, vutuka na nzila."

Bubuyai, beto ta mona mpila Yonasi mpi vutukaka, na nima yandi me vila nzila ya Nzambi.

MAMBU YA NENE YA LESO YAI:

1. Nzambi tindaka mbisi sambu na kumina Yonasi

A. Tanga: *Yonasi 2:1a* (kitini ya ntete)

1 Mfumu Nzambi tindaka mbisi ya nene ya masa, yo kwendaka kumina Yonasi. . .

B. Yula bana :

- Na nsuka ya lesa me luta, Yonasi vandaka wapi ? (Na kati ya divumu ya mbisi ya masa.)

C. Songa inki me salama : Bana tatu sala theatre. Mosi vanda ndinga ya Nzambi ya ke tuba na mbisi, mosi vanda Yonasi na kati ya masa, ti mosi vanda mbisi. Mbisi kangula maboko bonso yo ke kangula munoko, ebuna yo simba Yonasi.

D. Yima ti kina kusonga inki me salama: Nkunga, ton ya ‘Yesu Azali Awa’: Mbisi minaka yandi (mbala 3) O mawa!

2. Yonasi salaka bilumbu 3 na divumu ya mbisi

A. Tanga *Yonasi 2:1b*, (kitini ya nsuka)

2b Yandi vandaka na kati ya divumu ya mbisi yina bilumbu tatu, mpimpa ti mwini.

B. Yula bana:

- Yonasi salaka ntangu ikwa na kati ya mbisi? (Bilumbu tatu mpimpa ti mwini)
- Yindula. Nge banza yo vandaka inki mutindu na divumu ya mbisi yina? (Longi, kuwa mabanza ya bana.)

C. Songa inki me salama: Bana sala theatre kusonga boma ti mpasi ya Yonasi na divumu ya mbisi. Bana lenda tanga lumbe ya ntete, ya zole, ya tatu.

D. Yimba ti kina kusonga inki me salama: Nkunga, ton ya ‘Yesu Azali Awa’: Yandi monaka mpasi (mbala 3) O mawa!

3. Na sika yina, Yonasi sambaka Nzambi ti ndimaka masumu na yandi

A. Tanga: *Yonasi 2:2-3, 10c*

2 Kuna na kati ya divumu ya mbisi yina, Yonasi sambaka Mfumu Nzambi, Nzambi na yandi, nde:

3 Mfumu Nzambi, ntangu mono vandaka na mpasi, mono bingaka nge, nge ndimaka mono. Kuna na nsi ya bafwa, mono bingaka nge na ndinga ya ngolo, nge waka ndinga na mono. 10 . . . mono ta sala mambu yonso ya mono tubaka.

B. Yula bana:

- Yonasi salaka inki na divumu ya mbisi? (Yandi sambaka Nzambi.)
- Na nsuka ya lombilu na yandi, yandi silaka inki na Nzambi ? (Yandi silaka nde yandi ta sala yonso ya yandi tubaka.)

C. Songa inki me salama: Bana sala theatre ya mpila Yonasi sambaka Nzambi na divumu ya mbisi.

D. Yimba ti kina kusonga inki me salama: Nkunga: Mono ata lemfuka (mbala 3) Ntangu yai! Mono zola vutuka (mbala 3) na Nzambi!

4. Nzambi songaka mbisi kuluka Yonasi

- Tanga: *Yonasi 2:11*

11 Ebuna Mfumu Nzambi songaka mbisi ya masa na kwenda kuluka Yonasi. Yo yina mbisi lukaka Yonasi na lweka ya nzadi.

Yula bana:

- Inki mutindu Yonasi basikaka na divumu ya mbisi yina? (Nzambi songaka mbisi kuluka Yonasi ti mbisi salaka yo, na lweka ya nzadi.

C. Song inki me salama: Bana sala theatre--bana yonso sala bonso bo kele mbisi ke mina Yonasi. Yonasi telema kusonga nde yandi me basika, kele na masa diaka ve, kansi na zulu ya ntoto!

D. Yimba ti kina kusonga inki me salama : Nkunga: Mbisi lukaka yandi (mbala 3) Na ntoto!

Kumanisa Leso: Yonasi silaka Nzambi nde yandi ta sala bonso Nzambi zola. Keti mbala yai yandi kieleka ta lemfuka? Beto ta songa beno na mposo ke kwisa.

MALONGI YA BAKRISTO: Vanda na ntangu ya lombilu, konso muntu kulomba Nzambi na nsi ya ntima na yandi, kulomba pardo ya masumu yonso. Kuvutuka na Nzambi lomba mpi nde beto lemfuka na Yandi. Kana mwana ke na probleme yandi zola solula, yandi lenda nangula diboko. Na nima ya ecodim, nge ta mona bana yina sambu na kusadisa bo kuzaba inki mutindu bo lenda tina masumu.

VERSE YA KULONGUKA:

Yesaya 44:22, kitini ya nsuka: "Kwisa vutuka na mono, mono muntu ke gulusaka nge."

Reperer mbala 6. Bana lenda sala bonso "echo". Nge ta kabisa bana na bandambu tatu. Nge ta tuba konso phrase na ndinga ya ngolo. Ndambu ya ntete ya bana ta tuba yo na ndinga kaka ndambu ngolo. Ya zole ta tuba yo ndambu pima, ya tatu ta tuba yo pima mingi. Sala kiteso mosi na konso kitini. Bana lenda sala na geste bonso bo ke binga muntu. Bo mpi lenda balula sambu na kutuba yo.

YIMBA: Nzambi kele sosa nge! (Mbala 3) Ntangu yai!

KUBINGA NA YESU:

Kana bana ya nkaka ke zaba ve ya kieleka nde bo kele bana ya Nzambi kansi bo zola yamba Yesu bubuyai, bo lenda bikala na nima ya ecodim. Songa bo kisika bo lenda vanda. Nge lenda sadisa bo ntete, na nima bakristo ya zola kubika masumu.

====

NSUKA YA LESO 3

====

LESO 4 NZAMBI TESAKA YONASI MBALA YA ZOLE

BAVERSE YA LESO : Yonasi 3:1-4

KIKUMA: Kuzaba nde, ata nge me bwa na masumu, Nzambi zola kutedimisa nge. Yandi lenda tesa nge diaka kana nge ta kaka vutuka na Yandi.

KULONGUKA MIKANDA YA BIBLE:

Reviser: Bible ya mvimba kele na bandambu ikwa? (2)

Bandambu yina kele inki? (Kuwakana ya Ntama ti Kuwakana ya Mpa)

Bandambu ya Kuwakana ya Ntama kele ikwa? (4)

Bana repeter yai na ritima: Moise, Histoire, Poesie, Bamitubi

Bandambu yina kele inki? (Mikanda ya Moise, ya histoire, ya poesie, ti ya bamitubi)

Mukanda ya Yonasi kele na Kuwakana ya Ntama to ya Mpa? (ya Ntama)

Mukanda ya Yonasi kele na inki ndambu ya Kuwakana ya Ntama? (na mikanda ya bamitubi)

Yika malongi yai:

Mikanda ya bamitubi kele 17. Mikanda 5 kele ya ndaa, ya nene; ti Mikanda 12 kele ya nkufi.

Yonasi kele mosi na kati ya mikanda 12 ya nkufi. (Yo kele na kaka bakapu 4.) Yonasi kele na mikanda ya bamitubi sambu yandi mpi vandaka mutubi ya Nzambi.

REVISIO: Na histoire ya beto ke landa, beto me bika Yonasi wapi? (Na mukidi ya masa, sika mbisi me luka yandi) Inki Nzambi songaka yandi kusala mbala ya NTETE? (Kukwenda kusamuna na Ninive)

Inki Yonasi salaka ntete? (Yandi tinaka--lemfukaka ve. YANDI BEBISAKA.) Bana tuba mbala 3: NTETE, YANDI BEBISAKA.

KUYANTIKA LESO: Solula ti bana inki mutindu muntu ta monika kana yandi me sala bilumbu tatu ya divumu ya mbisi, ti inki mutindu Yonasi waka na ntima. Muntu mosi sala theatre bonso yandi kele Yonasi na nima ya mbisi me luka yandi na mukidi ya masa. Yonasi vutukaka na Nzambi ntangu yandi sambaka Nzambi na kati ya divumu ya mbisi yina. Bambuka nde yandi tubaka, "Mono ta sala yonso."

YIMBA: "Mono ata lemfuka, ntangu yai" (Ton: Yesu azali awa)

MAMBU YA NENE YA LESO YAI:

1. Nzambi binga Yonasi mbala ya zole.

A. Tanga: *Yonasi 3:1-2 na malembe yonso.*

1 Mfumu Nzambi tubaka na Yonasi mbala ya zole nde:

2 Nge Yonasi, kanga bima nge kwenda na Ninive, bwala yina ya nene-nene, Zabisa bantu ya bwala yina mambu yai ya mono ke songa nge."

B. Yula bana:

- Nzambi songaka Yonasi mbala ya zole kusala inki? (Kwenda na Ninive ti zabisa bo mambu Mono ta songa--kaka kiteso mosi bonso yandi songaka yandi mbala ya ntete)

C. Songa inki me salama: Bana sala theatre ya mpila Nzambi bingaka Yonasi mbala ya zole

D. Yimba ti kina kusonga inki me salama: "Nzambi bingaka diaka, Yonasi" (ton: Yesu azali awa)

MALONGI YA BAKRISTO: Ata nge me bwa, ata nge me bebisa yina ya Nzambi songaka nge, Nzambi zola tedimisa nge. Yandi zola kutesa nge diaka, kana nge ta kaka vutuka na Yandi.

YIMBA: Ata nge me bebisa (yimba mbala tatu) Vutuka na Yesu! (ton: No. 53, Bankunga ya Kiese)

Lombilu sambu na bakristo ya zola vutuka na nzila: Kana bana ya nkaka kele bakristo, kansi bo zaba nde bo me bwa, bo lenda telema ntangu yai. Tula bo na lombilu.

VERSE YA KULONGUKA: Yesaya 44:22 diaka. Bana tuba yo mbala zole, na nima bana 4 meka kutuba yo bo mosi. Na nsuka, bana yidika ton bo mosi, bo yimba yo.

Beto landa diaka leso ya Bible:

2. Yonasi Lemfukala—Yandi Kwendaka na Ninive.

A. Tanga: *Yonasi 3:3* na malembe yonso.

3 Na mbala yai Yonasi ndimaka, yandi kwendaka na Ninive mutindu Mfumumu Nzambi tubilaka yandi. Ninive vandaka bwala mosi ya nene mpenza, muntu fweti sala bilumbu tatu na kuzenga yo nsongi na nsongi.

B. Yula bana:

- Inki mutindu Yonasi lemfukaka na Nzambi? (kwendaka na Ninive)
- Bwala Ninive vandaka inki mutindu? (Nene mingi).

C. Songa inki me salama: Bana sala theatre ya mpila Yonasi ke kwenda na Ninive. Yandi tambulaka mingi sambu yo vandaka mwa-ntama. Bana yonso lenda tambula na nzila tii bo kuma na sika ya nkaka ya beto ta tuba kele Ninive.

D. Yimba ti kina kusonga inki me salama: "Ee, Yonasi kwendaka, na Ninive" (Ton: Yesu azali awa)

3. Yonasi samunaka na Ninive.

A. Tanga: *Yonasi 3:4* na malembe yonso.

4 Yonasi kwisaka kukuma na bwala yina, yandi salaka kilumbu mosi ya mvimba. Ntangu yai yandi yantikaka kulonga bantu na ndinga ya ngolo nde: "Na nima ya bilumbu makumi iya (40) Nzambi ta fwa bwala yai Ninive!"

B. Yula bana:

- Yonasi salaka inki na Ninive? (samunaka to songaka bo ndinga ya Nzambi)
- Inki malongi yandi pesaka bo? (Na nima ya bilumbu 40 Nzambi ta fwa bwala Ninive.)

C. Songa inki me salama: Bana sala theatre ya mpila Yonasi ke samuna.

D. Yimba ti kina kusonga inki me salama: "Nzambi ta fwa bwala yai, O mawa!" (ton: 'Yesu azali awa')

Kumanisa Leso: Mawa na bwala Ninive! Kansi kiese, kiese, kiese na Yonasi, sambu yandi lemfukaka na Nzambi. KETI BANTU YA NINIVE TA WILA MALONGI YA YONASI? Kwisa na mposo ke kwisa--beto ta mona kana bo ta kuwa mutubi ya Nzambi to ve.

KUBINGA NA YESU:

Kana nge ne ndima Yesu ntete ve, zaba nde, bonso bwala Ninive vandaka na bilumbu 40 kaka me bikala na bo, Nzambi zaba nombre ya bilumbu ya me bikala na nge. Kana nge kufwa bubuyai, nge ta kwenda wapi? Yesu zola gulusa nge bubu kana nge ta tula ntima na Yandi.

Yimba: Kwisa na Yesu Kristo! (mbala tatu) Nge ata guluka! (Ton: No. 53, BK)

====

NSUKA YA LESO 4

====

LESO 5 NINIVE BALULAKA NTIMA

BAVERSE YA LESO: Yonasi 3:5-10

KIKUMA YA LESO: Kuzaba nde, kana ya kieleka muntu me balula ntima, yo fweti monika na bisalu to na luzingu na yandi. Muntu na muntu kudyula keti yandi zaba nde yandi me balula ntima ya kieleka.

MIKANDA YA BIBLE: Yonasi ikele mukanda ya tanu na kati ya mikanda ya nkufi ya bamitubi ya Nzambi. Longuka mikanda tanu ya ntete yina. Kana bana ikele na Bible, sadisa bo kumona mukanda ya Yonasi.

VERSE YA KULONGUKA: Matayo 3:8 (Tuba yo mbala 5, mutindu na mutindu, ebuna yimba yo mbala 3.

KUYANTIKA: Kana muntu tubaka nde me bikala bilumbu 40, Nzambi ta fwa bwala yai, nge ta sala inki? (Reviser malongi ya Yonasi na Ninive.)

MAMBU YA NENE YA LESO YAI:

1. Bantu ya Ninive kwikilaka Nzambi.

A. Tanga: *Yonasi 3:5* na malembe yonso.

5 Bantu ya Ninive monaka nde mambu yai ya Nzambi songaka bo yo fweti bwa mpidina; yo yina bo wakanaka nde konso muntu lenda kudia kima ve ata mvwama ata nsukami. Bantu yonso lwataka mp basaki sambu na kusonga nde bo ke na mawa.

B. Yula bana:

- Inki mutindu bo songaka nde bo kwikilaka ndinga ya Nzambi, mpi bo vandaka na mawa sambu na masumu na bo? (Bo kudiaka ve, ti bo lwataka basaki sambu na kusonga mawa sambu na masumu na bo.)

C. Songa inki me salama: Bana sala theatre ya bantu ke buya madia, ke lwata basaki.)

D. Yimba ti kina kusonga inki me salama : "Nzambi ta kufwa beto! O mawa!" (Ton: 'Yesu azali awa')

2. Mfumu ya Ninive balulaka ntima.

A. Tanga: *Yonasi 3:6-9* na malembe yonso.

6 Ntangu ntotila ya Ninive waka mambu yina, yandi telamaka na kiti na yandi ya kimfumu, yandi katulaka lele na yandi, yandi lwataka saki, ebuna yandi kwendaka kuvanda na kisika ya putulu ya tiya.

7 Yandi pesak nsiku na bantu ya Ninive nde: "Na zina ya mono mosi ti na zina ya bambuta yina kele na kimfumu na mono: Ata muntu mosi lenda kudia kima ve; bantu yonso, bangombe ti mameme, bo lenda kudia to kunwa ve.

8 Bantu yonso ti bambisi yonso bo fweti lwata basaki. Konso muntu fweti samba Nzambi ngolo, konso muntu mpi fweti bikisa banzila na yandi ya mbi ti mambu yonso ya mbi ya yandi ke salaka.

9 Mbala ya nkaka Nzambi ta balula mabanza na yandi, yandi ta wa diaka makasi ve, mpidina beto ta fwa ve.

B. Yula bana:

- Inki mutindu Mfumu songaka nde yandi kwikilaka? (Yandi kulumukaka na kiti na yandi ya kimfumu, yandi katulaka bilele na yandi ya kimfumu, yandi lwataka basaki, yandi tulaka putulu ya tiya na nitu, yandi vandaka na zulu ya ntoto. Tala na mambu yonso yandi vandaka kudikumusa na ntwala ya Nzambi.)
- Inki nsiku Mfumu tulaka? (Bo lenda kudia ve, kunwa ve, ata bantu, ata bambisi. Bo yonso fweti lwata basaki. Bo fweti lomba Nzambi ngolo. Bo fweti bikisa imbi ya bo).
- Sambu na inki bo fweti sala mpidina? (Mbala ya nkaka Nzambi ta wila bo mawa, sambu bo vila ve.)

C. Songa inki me salama : Bana sala theatre ya ke songa Mfumu ya Ninive ke wa mawa, ke lwata basaki, ke tula putulu ya tiya, ke vandaka na ntoto. Sala theatre ke songa nde Mfumu ke songa bantu nsiku, bo ke wa. Na nima songa mpila bo vandaka kubuya madia, kulwata basaki, na bambisi mpi, kulomba Nzambi ngolo.

D. Yimba ti kina kusonga inki me salama: Beto balula ntima--Ntangu yai! Beto bikisa mbi--Ntangu yai!

MALONGI YA BAKRISTO:

Kana muntu me balula ntima na Yesu, yo ke monika na bikalulu na yandi. (Tuba diaka verse, Matayo 3:8) Inki mutindu luzingu na nge ke songa nde nge kele mukristo? Yula Nzambi sesepiyai kana inki mambu ya nge ke sala ya ke songa ve nde nge kieleka me balula ntima. (Kinga sambu na lombilu na nsi ya ntima ya konso mwana.)

Yimba: Luzingu fweti changer--Mukristo!

Beto vutuka na malongi ya lesa:

3. Nzambi pindulaka mpi mabanza sambu na bo.

A. Tanga: *Yonasi 3:10* na malembe yonso.

10 Nzambi monaka mambu yonso ya bo salaka. Yandi monaka nki mutindu bo bikisaka banzila na bo ya mbi. Yo yina yandi balulaka mabanza na yandi, yandi salaka diaka ve mambu yina ya nene ya yandi zolaka kusala bo.

B. Yula bana:

- Inki mutindu Nzambi balulaka mabanza sambu na bo? (Yandi wilaka bo mawa, Yandi fwaka bo ve bonso Yandi zolaka kusala ntete.)

C. Songa inki me salama: Bana sala theatre ke songa kiese ya bantu ntangu Nzambi wilaka bo mawa. (Bo lenda yimba, kina,etc.)

D. Yimba ti kina kusonga inki me salama: Beto ata kufwa ve--O kiese! Beto me bika masumu, O kiese!

KUBINGA NA YESU: Kana nge me balula ntima ve, Nzambi mpi ta kufwa nge na bilungu, sambu nge mpi ikele muntu ya masumu bonso bantu ya Ninive. Kansi, kana nge ta balula ntima bonso bo, nge mpi ta fwa ve. Keti nge me balula ntima na Yesu Kristo? Yandi mosi me tuba: "Konso muntu yina ta kwisa na mono, mono ta buya yandi ve." (Yoane 6:37)

Yimba: Kwisa na Yesu Kristo (mbala 3) Nge ata guluka! (No. 53, BK) Menga n'yandi me lunga (mbala 3) Kukatula imbi! Balula ntima na nge (mbala 3) Bika Yesu kota!

====

NSUKA YA LESO 5

====

LESO 6 NZAMBI SONGAKA YONASI NTIMA NA YANDI

BAVERSE YA LESO : Yonasi 4:1-11

KIKUMA YA LESO: Kuzaba nde Nzambi zola basielo na yandi kuvanda na ntima ya mawa ti na luzolo sambu na bantu, mutindu ntima na Yandi ikele. Beto bakristo fweti zola ata bambeni na beto. Beto wila bo mawa, bo lombila bo Nzambi, beto sosa mambote na bo.

MIKANDA YA BIBLE: Tuba diaka mikanda 5 ya ntete ya mikanda ya nkufi ya bamitubi ya Nzambi. Tuba mukanda ya kele na ntuala ya Yonasi ti yina ya kele kulanda yo. Mona Yonasi diaka na kati ya Bible.

YIMBA: Beto Zolana.

VERSE YA KULONGUKA: Matayo 5:44. Bana tuba yo mbala 6, mutindu na mutindu.

MALONGI YA LESO:

1. Yonasi vandaka na makasi.

A. Tanga : Yonasi 4:1-3 na malembe yonso.

1 Yonasi monaka kiese ata fioti ve mutindu Mfumu Nzambi balulaka mabanza na yandi, yandi waka makasi.

2 Yo yina yandi sambaka Mfumu Nzambi nde : « Mfumu, keti yai kele ve mutindu mono banzaka nde nge ta sala ntangu mono vandaka diaka na bwala na beto ? Yo yina mono tulaka ngolo na kutina ka mono na bwala Tarsisi. Mono zabaka nde nge kele Nzambi mosi ke zolaka bantu, ke wilaka bo mpi mawa; ntangu yonso nge ke monaka makasi nswalu ve, nge ke songaka mambote na nge, nge ke bikisaka mpi nswalu mabanza na nge ya kupesa bantu ndola.

3 Ntangu yai Mfumu, baka moyo na mono. Kuluta mbote mono kufwa, mono zola zinga diaka ve. »

B. Yula bana :

- Sambu na inki Yonasi vandaka na makasi? (Sambu yandi zolaka nde bantu ya Ninive kufwa kaka. Yandi vandaka na kiese ve nde Nzambi wila bo mawa.)
- Yandi lombaka Nzambi kusala inki? (Kufwa yandi.)

C. Kusonga inki me salama : Bana sala theatre ke songa makasi ya Yonasi ti mpila yandi vandaka kubokuta na Nzambi.

D. Yimba ti kina kusonga inki me salama: O Yonasi makasi--O mawa!

2. Yonasi zolaka kaka nde Nzambi kufwa bantu ya Ninive.

A. Tanga: Yonasi 4:4-5 na malembe yonso.

B. Yula bana:

- Inki Nzambi yufulaka Yonasi? (Yandi yufulaka Yonasi kana yandi salaka mbote na kuvanda makasi.)
- Yonasi kwendaka wapi? (Na ndambu ya Est ya bwala Ninive.)
- Sambu na inki? (Sambu na kumona inki mambu ta bwila bo. Tala nde tii ntangu yai yandi ke zola kaka nde Nzambi kufwa bo kaka.)

C. Songa inki me salama : Bana sala theatre kusonga Yonasi mpila yandi ke vandaka na ndambu ya Este, ke tala bwala Ninive na makasi.

D. Yimba ti kina kusonga inki me salama: Makasi simbaka yandi--O la la!

3. Nzambi sadisaka Yonasi.

A. Tanga : *Yonasi 4:6-9* na malembe yonso.

6 Ebuna Mfumu Nzambi menisaka mwa-nti sambu na kupesa Yonasi madidi. Yonasi monaka kiese mingi sambu na mwa-nti yango ; yo katulaka mpasi na yandi.

7 Kansi na kilumbu landaka na suka-suka, Nzambi tindaka niama mosi sambu na kwenda kudia-dia mwa-nti yina ; ebuna mwa-nti yongo yumaka.

8 Ntangu ntangu basikaka, Nzambi tindaka mupepe ya tiya yina ke katukaka na ndambu ya este. Yonasi zolaka kubwa sambu ntangu vandaka kubula yandi ngolo na zulu ya ntu. Yo yina yandi lombaka lufwa nde : « Kuluta mbote mono kufwa, mono zola zinga diaka ve. »

9 Kansi Nzambi tubilaka yandi nde, « Ketu yo kele mbote nge na kumona makasi sambu na mwa-nti yai ? » Yonasi vutulaka nde, « Ya kieleka, mono fweti mona makasi, makasi ya lufwa mpenza ! »

B. Yula bana :

- Nzambi pesaka inki sambu na kupesa Yonasi madidi? (Dititi mosi ya yelaka nswalu.)
- Na nima, Nzambi salaka inki? (Yandi tindaka niama mosi sambu yandi kudia yo, ebuna yo fwaka.)
- Ketu Yonasi ndimaka nswalu nde mabanza na yandi vandaka mbi? (Ikele ve. Yandi tubaka kaka bonso yandi me yindula mbote.)

C. Songa inki me salama: Bana sala theatre ke songa Yonasi na kiese na nsi ya madidi. Na nima, katula dititi, ti songa mpila yandi ke na mpasi na nsi ya ntangu, ti mpila yandi ke na makasi.

D. Yimba ti kina kusonga inki me salama: Yonasi waka mpasi--ya ntangu!

4. Nzambi longaka Yonasi inki ikele mfunu.

A. Tanga: *Yonasi 4:10-11* na malembe yonso.

10 Mfumu Nzambi nde: “Nge ke mona mawa sambu na mwa-nti yai ya nge me monina mpasi ve. Nti yai kulaka mpimpa mosi, ebuna na mpimpa landaka yo yuma. Nge ve muntu menisaka yo kansi nge ke mona yo mawa.

11 Ebuna mono, keti mono lenda mona mawa ve sambu na Ninive, bwala yai ya nene-nene, ke na bantu kuluta mile nkama mosi makumi (120,000) bayina me zaba ve kusola wapi mambu ya mbote ti mambu ya mbi, bwala yina kele mpi na bambisi mingi? Nki mutindu mono lenda wila bwala yai mawa ve?"

B. Yula bana:

- Yonasi monaka bonso inki vandaka mfunu? (Dititi yina, sambu yo pesaka yandi madidi, ebuna yandi monaka ve mpasi na ntangu.)

C. Songa inki me salama : Bana sala theatre: Muntu mosi ta sala bonso yandi kele Nzambi. Na diboko mosi yandi ta songa dititi. (Yai kele yina ya Yonasi monaka mfunu.) Na diboko ya nkaka songa bantu. (Yai kele yina ya Nzambi monaka mfunu.)

D. Yimba: O, Nzambi zola bantu! Zola bo!

MALONGI YA BAKRISTO: Beto bakristo fweti vanda na mabanza bonso Nzambi. Beto fweti zola bantu, ata bambeni na beto. Nani kele mbeni na nge? Nani me pesa nge mpasi? Keti nge ta wila yandi mawa? Keti nge ta tula yandi na lombilu sesepiyai? (Mwana mosi twadisa ntangu ya bisambu sambu na bantu ya me sala bo mpasi.) Muntu na muntu tanga zina ya muntu me pesa bo mpasi, ye tuba, "Nzambi, sakumuna yandi." Solula mambu ya mbote bo lenda sala bantu yai na mposo ke kwisa.

YIMBA: Beto Zolana.

KUBINGA NA YESU: Nzambi zola nge mingi. Yandi zola ve nde nge mona mpasi na bilungi. Kansi bonso bantu ya Ninive, nge fweti balula ntima. Keti nge ta balula ntima na Yesu Kristo bubuyai? Kana nge zola solula mambu yai, kwisa vanda na sika yai (longi, songa kisika) na nima ya ecodim.

===

NSUKA YA LESO 6

===

LESO 7 BETO YINDULA DIAKA MALONGI YA YONASI

KIKUMA: Kuzaba nde Nzambi zola bantu yonso kubalula ntima, ebuna beto tula bavidi na lombilu mpi zabisa bo nsangu ya Yesu.

BAVERSE YA LESO: Mukanda ya Yonasi ya mvimba, kapu 1-4.

VERSE YA KULONGUKA: 2 *Piere* 3:9. Tuba yo mbala 6, mutindu na mutindu.

Bantu ya nkaka ke yindulaka nde Nzambi me sukinina na kusala mambu yina ya yandi silaka, kansi mpidina ve. Nzambi ke kangaka ntima sambu na beno, sambu yandi ke zolaka ve nde ata muntu mosi kuvila ; kansi yandi ke zolaka nde bantu yonso kubalula ntima.

MIKANDA YA BIBLE: Yindula diaka bimvuka ya mikanda na Kuwakana ya Ntama--Mikanda ya Moise, ya Histoire, ya Poesie, ya Bamitubi ya Nzambi, ya ndaa ti ya nkufi. Bambuka nde Yonasi ikele mukanda na kimvuka ya nsuka-mikanda ya nkufi ya bamitubi ya Nzambi.

YIMBA: Ton : Nkunga ya Lingala ‘Fungula ntemo a yo Yesu akota kuna’ (Balula nkunga na Kituba—‘Balula ntima sambu Yesu ta kota kuna’)

KUYANTIKA LESO: Songa tiya. Yula nani zola tula musapi na kati na yo.

MALONGI YA NENE YA LESO YAI: Nzambi zola ve nde bantu mona ndola na tiya. Yandi zola bo yonso kuguluka. Yo yina----(Bana repeter konso phrase ti sala bageste mbala tatu.)

- Yandi songaka Yonasi kusamuna na Ninive.
- Yandi sosaka Yonasi, ata Yonasi tinaka Yandi.
- Yandi tesaka Yonasi diaka, sambu yandi lombaka ndolula.
- Yandi lolulaka Ninive, sambu bo balulaka ntima.
- Yandi longaka Yonasi mutindu Yandi ke zolaka bantu.

NSAKA YA REVISIO : Sonika na bapapiers na bisono ya nene mambu ya nene ya salamaka na mukanda ya Yonasi, mambu mosi na konso papier. (Kana muntu ke ngolo kudessiner, yika badessin ke songa inki salamaka.) Balula bapapiers sambu yo keke na ndonga ve. Pesa papier mosi na mwana mosi, tii yo mana. Ebuna bana fweti tula bapapiers yina na ndonga, bonso na ordre yo salamaka. Bana ya nkaka songa kana bo me sala mbote to ve.

Mambu yina sambu na papiers:

- Nzambi songaka Yonasi kukwenda na Ninive.
- Yonasi tinaka Nzambi.
- Yonasi kotaka na maswa.
- Nzambi tindaka ntembo.
- Bo losaka Yonasi na masa.
- Mbisi ya masa minaka yandi.
- Yonasi sambaka Nzambi ti balulaka mabanza na yandi.
- Mbisi lukaka Yonasi.
- Nzambi songaka Yonasi mbala ya 2 kukwenda na Ninive.
- Yonasi samunaka na Ninive.

Bantu ya Ninive balulaka ntima na bo.
 Nzambi wilaka Ninive mawa.
 Yonasi vandaka makasi sambu na mambote ya Nzambi na bantu ya Ninive.
 Nzambi tindaka nti yo yela nswalu kufika Yonasi.
 Nzambi tindaka niama sambu nti kufwa.
 Nzambi songa nde Ninive keke na bantu 120,000 ya ke zaba ve mbote to mbi.

REVISIO YA BAVERSE: Pesa bacarte ya baverse na bana mosi-mosi. Mwana mosi telama, kukonda kusonga verse yina, yandi tanga to tuba ndambu na yo. Ntangu yandi bika, bana ya nkaka na kimvuka fweti manisa kutuba verse yina.

MALONGI YA BAKRISTO: Nzambi zola bantu yonso kuguluka, kansi bo ta guluka kaka kana bo balula ntima. Beto bakristo tula bo na lombilu, ye beto songa bo nsamu ya Yesu. Sesepiyai, yindula mazina ya banduku to bampangi zole ya zaba Yesu ve. (Tula bo na lombilu.) Kana mpila ikele, pesa bana papier sambu bo sonika bazina yina, bo bambuka kutula bo na lombilu konso lumbu. (Pesa bana encouragement na kubinga bantu yina na ecodim to na kusionikila bo.)

KUBINGA NA YESU: Nzambi zola bantu yonso kuguluka, kansi nge ta guluka kaka kana nge tula ntima na Yesu Kristo. Kana nge zola lusadisu na mambu yai, sosa mono na nima ya ecodim bubuyai. Mono zola sadisa nge.

YIMBA: Kwisa na Yesu Kristo (3 fois) Nge ata guluka! (No. 53, BK)

===

NSUKA YA LESO 7

===

LESO 8 NSUKA YA NINIVE

BAVERSE YA LESO : Mukanda ya Nahumi, 2 Bansangu 32:1-22, 2 Bantotila 19: 36-37

KIKUMA YA LESO: Kuzaba nde, kana bantu balula ntima ve, Nzambi fweti kufwa bo na bilungi. Yo yina, tula ngolo kubenda bantu kubalula ntima na bo.

MIKANDA YA BIBLE: Yonasi kele mukanda ya tanu ya bamitubi ya nkufi. Nahumi kele mukanda ya nsambwadi. Bana lenda tuba mikanda yina na groupes ya tatu: Ozea, Yoele, Amosi ; Abdiasi, Yonasi, Mishe ; Nahumi, Habakuki, Sofonia ; Agai, Zakaria, Malashi.

Mikanda ya 1 & 2 Bantotila ti 1 & 2 Bansangu kele na kati ya mikanda ya histoire ya Kuwakana ya Ntama.

YIMBA: "Mono kele na nzo kitoko" (Bankunga ya kiese #38) Ton: Do Lord
"Mawa, mawa, kuvanda mwana-Satana"

KUYIDIKA NA NTWALA YA CLASSE: Lomba bana kusala nge banzo zole ya mikobodi. Nata zelo ya kulunga kufika banzo yina. Sosa craie ti tableau ya craie.

VERSE YA KULONGUKA: 2 Piere 3:9 diaka. Tuba yo mbala 2, ebuna sola bana 3 na kutuba yo na meso ya bantu yonso. Kana bo zaba yo mbote, bo lenda tuba yo sambu na bambuta na bisambu.

KUYANTIKA LESO: 2 Piere 3:9 ke songa beto nde Nzambi zola nde bantu yonso balula ntima sambu yandi lenda gulusa bo. Yonasi samunaka na Ninive. Bo balulaka ntima, ebuna Nzambi fwaka bo ve. **INKI KELE NSUKA YA BANTU YA MBI KANA BO BALULA NTIMA VE?**

MAMBU YA NENE YA LESO YAI:

1. Na nima ya ntangu, Ninive vutukaka na nzila ya imbi.

Bamvula 150 na nima ya Yonasi, bantu ya Ninive kumaka imbi mingi diaka. Bankaka na bo ya balulaka ntima, kansi na nima bambuta yina kufwaka, ebuna bana na bo yantikaka kusala imbi diaka.

Kana beto tanga mukanda ya Nahumi na Bible, mpi kana beto tala mambu ya bantotila na bo sonikaka na matadi, beto mona inki mutindu bwala Ninive kumaka:

A. Tanga : Nahumi 3:1 & 16.

I A bwala Ninive, mawa mingi ! Yo me fulukaka na luvunu ti na menga ya bantu, yo kele nku mingi ti muyibi.

Yula bana : Bwala vandaka inki mutindu? (Bwala ya LUVUNU, ya MENGA ti MUYIBI) (Mwana mosi sonika na zulu ya tableau: LUVUNU, MENGA, ti MUYIBI).

B. Tanga : Nahumi 1:14b.

Mfumu Nzambi. . . « ta fwa biteki yonso ya banti ti ya bibende yina kele na nzo ya banzambi na beno. »

Yula bana : Bwala vandaka inki mutindu? (Bwala ya BITEKI) Bantu ya ke longuka histoire songa beto nde bo sambaka ngombe ya bakala ya vandaka na luse ya muntu ti mansala ya ndeke. (Mwana mosi sonika na zulu ya tableau : BITEKI

C. Tanga : *Nahumi 3:4.*

4 Bwala Ninive kele bonso nkento ya ndumba ; mambu yai yonso me bwila yandi sambu yandi mosi kudipesaka na kusala pite ; yandi vandaka kubenda bantu mingi na kitoko na yandi ti kubwisa bo na kindoki na yandi.

Yula bana : Bwala vandaka inki mutindu? (Bwala ya PITE ti ya KINDOKI) Bo fwaka bafami ti bainsi ya mvimba na magie na bo. Mwana mosi sonika na zulu ya tableau : PITE ti KINDOKI.

D. Tanga : *Nahumi 3:3b.*

3 . . . Bambele ya bitumba ti makonga ke pela bonso tiya ! Bantu ke fwa mingi, mpila ya kutanga kele ve ; bantu ke nata bamvumbi.

Yula bana : Bwala vandaka inki mutindu? (Bwala ya BITUMBA ti ya LUFWA) Mwana mosi sonika na zulu ya tableau : BITUMBA ti LUFWA.

E. Tanga : *2 Bansangu 32 : 13- 14 , 17a, 19 a* Yai ke songa inki Mfumu ya Ninive zina ya Senakeribi songaka Mfumu ya bantu ya Nzambi.

13 Keti beno me vila mambu ya bankaka na mono ti mono mosi me salaka na bantu yonso ya nsi-ntoto ? Keti banzambi na bo kukaka kugulusa bantoto na bo na maboko na mono ?

14 Kele ve, ata nzambi mosi ve ya bantoto yina ya bankaka na mono botulaka kukaka ve na kugulusa bantu na yandi. Ebuna nki mutindu beno ke yindula nde Nzambi na beno ta kuka kugulusa beno na maboko na mono, ntotila ya nene ya Asiria ?

17 Ntotila ya Asiria tindaka mpi mukanda sambu na kufinga Mfumu Nzambi, Nzambi ya Israele. . .

19 Bo vandaka kufinga-finga Nzambi ya Yeruzalemi. . .

Yula bana : Mfumu ya Ninive Ezekiasi vandaka inki mutindu? (Muntu ya LULENDO ti ya KUFINGA NZAMBI.) Ninive vandaka mpi bwala bonso ntotila na yo. Ntotila na bo Senakeribi tubaka nde yandi vandaka 'Mfumu ya bainso yonso, ata ya bambwetete yonso.' Mwana mosi sonika na tableau : LULENDO ti KUFINGA NZAMBI.

Yimba : "Mawa, mawa kuvanda mwana-Satana"

2. Nzambi wilaka bo mawa.

Nzambi zolaka bo, yo yina Yandi pesaka bo mbala zole diaka ya bo lenda kubalula ntima.

A. Mbala ya ntete-- 2 Bansangu 32:1-22

Tanga histoire na nkufi: Ntotila na bo Senakeribi ziungaka Yeruzalemi. Yandi fingaka Nzambi (vs. 15,17,19a). Ebuna Nzambi tindaka wanzio (vs. 21) sambu na kufwa basolda na yandi. Senakeribi vutukaka na Ninive na nsoni. Senakeribi monaka nde Nzambi kele na ngolo yonso, kansi yandi balulaka ntima ve. Yandi vutukaka na Ninive diaka, ti yandi

yantikaka kusamba kiteki na yandi. Bana zole ya yandi Senakeribi kotaka kisika ya yandi vandaka kusamba kiteki yina, ebuna bo fwaka tata na bo. Mwana ya nkaka ya Senakeribi kumaka ntotila ya Ninive na nima ya tata, kansi yandi landaka kaka kusala imbi, mpi kubuya Nzambi (21b).

Yimba: Mawa, Mawa, kuvanda mwana-Satana. Kiese, kiese, kuvanda mwana ya Nzambi.

B. Mbala ya zole ya Nzambi pesaka bo ntangu kubalula ntima diaka. Nzambi tindaka mutubi ya zole (*ya ntete vandaka Yonasi). Zina ya mutubi ya zole vandaka Nahumi. Yandi vandaka kusonga bo imbi na bo mpi ndola ya Nzambi fweti pesa bo.

Beto me tanga dezia mpila Nahumi songaka bo masumu na bo. (Tala liste ya masumu bana me sonika na zulu ya tableau.)

Nzambi zolaka gulusa bo, kansi bonso Senakeribi, bo buyaka kubalula ntima na bo.

Songa inki me salama : Bana sala theatre ke songa Nahumi ke samuna na Ninive, bantu ke wa ve.

Yimba: Mawa, mawa kuvanda mwana-Satana

3. Nzambi pesaka bo ndola.

Bo balulaka ntima ve na malongi ya Nahumi, yo yina Nzambi fwaka bwala Ninive.

Bantu ya Mede ti ya Babylon kwisaka kunwanisa bo, ebuna bo fwaka bwala Ninive yonso na mvula 612 na ntwala ya Yesu. Mutubi ya Nzambi Nahumi tubaka nde muntu ta tunga yo diaka ve, ebuna tii bubu yo me salama ve. Bubuyai, zelo ya desert me fuluka na zulu na yo, me fika yo yonso. Bonso Nahumi 3:19 tubaka, "mpila ya kutelema diaka ikele ve" sambu na bwala Ninive.

Bwala Ninive vandaka na ntoto ya beto bubu ke binga 'Iraqi.'

Kifwanisu: Tula ndambu bainzo ya mikobodi na zulu ya mesa. Kufwa yo na mbele, ebuna zika yo na zelo sambu na kusonga ndola ya Ninive.

Yimba: Mawa, mawa, kuvanda mwana-Satana

KUBINGA NA YESU: Kana bantu balula ntima ve, Nzambi fweti kufwa bo sambu na masumu na bo. Mawa na bantu yina buya kubalula ntima. Keti nge me balula ntima na nge? Kana nge me balula ntima ntete ve, kansi bubu nge zola, kwisa solula na mono na nima ya ecodim. Mono ta sadisa nge.

Yimba: Kangula ntima, sambu Yesu ta kota kuna!

MALONGI YA BAKRISTO: Keti nge bakisa nde Nzambi ta pesa ndola na bantu yonso yina balula ntima ve? Nge ke sala inki sambu na kubenda bampangi ti banduku na nge na Yesu? Keti nge ke tula bo na lombilu? Keti nge ke solula ti bo? Keti nge me benda bo kukwisa na ecodim sambu bo mpi lenda kuwa ndinga ya Nzambi?

Yimba: Mawa, mawa kuvanda mwana-Satana! O mawa! O mawa!
Kiese, kiese kuvanda mwana ya Nzambi! O kiese! O kiese!

===

NSUKA YA LESO 8

===

LESO 9 NZAMBI KELE NA NGOLO NA KUSADISA BETO

(Leso yai kele mbote konso ntangu, kansi yo kele mbote mingi na ntangu ya Paki.)

BAVERSE YA LESO YAI: Yonasi 2:1,2,7,10, Matayo 12:40, Filipino 3:10a

KIKUMA YA LESO: Kuzaba nde, ata mpasi me luta mingi ti beto ke mona bonso mpila ikele diaka ve, Nzambi kele na NGOLO NA KUSADISA beto kana beto lomba kaka lusadisu na yandi.

MIKANDA YA BIBLE: Bambuka diaka bimvuka zole ya nene ya Bible ya mvimba. Mukanda ya Yonasi kele na Kuwakana ya Ntama (na ntuala ya Yesu), kansi Matayo ti Filipino kele na Kuwakana ya Mpa (na nima ya Yesu). Matayo kele mukanda ya ntete na Kuwakana ya Mpa.

YIMBA: Nzambi ke ngolo--kusadisa beto! (Tone: Nzambi ke mbote) Nzambi ta kuwa nge-na zina ya Yesu! Yandi ta sadisa-na zina ya Yesu! (No. 49, BK)

VERSE YA KULONGUKA: Filipino 3:10a Tuba yo mbala 6, mutindu na mutindu.

Mambu ya mono ke zola kaka yo yai: Mono zola zaba Kristo ti ngolo yina ya Nzambi tedimisaka yandi na lufwa.

KUYANTIKA LESO: Sala theatre na kusonga mpasi mosi ya mwana ke mona ya yandi ke mona ngolo bonso mpila kele diaka ve. Yula bana inki bo ke mona na kati ya luzingu na bo ya bo ke mona ngolo bonso mpila ikele ve. Pesa nzila na bo kupesa mvutu.

MAMBU YA NENE YA LESO YAI:

1. Nzambi sadisaka Yonasi na ngolo na yandi

A. Tanga diaka: Yonasi 2:1

1 Mfumu Nzambi tindaka mbisi ya nene ya masa, yo kwendaka kumina Yonasi. Yandi vandaka na kati ya divumu ya mbisi yina bilumbu tantu, mpimp ti mwini.

B. Yula bana :

- Inki mpasi Yonasi monaka? (Yandi vandaka na divumu ya mbisi bilumbu 3 ti mpimpa 3.)

C. Tanga diaka : Yonasi 2:2,7

2 Kuna na kati ya divumu ya mbisi yina, Yonasi sambaka Mfumu Nzambi, Nzambi na yandi, nde : ...

7 Mono kulumukaka tii na nsi ya bangumba yina ke vandaka na kati ya masa ; kuna mono zolaka kukangama kimakulu. Kansi nge basisaka mono na mudindu yina, nge vutulaka moyo na mono, nge Mfumu Nzambi, Nzambi na mono !

D. Yula bana :

- Inki Yonasi salaka sambu na mpasi na yandi? (Sambaka Nzambi.)

- Beto sala inki na ntangu ya mpasi? Beto lomba Nzambi.

E. **Sala theatre** ke songa bantu ke lomba Nzambi.

F. **Tanga diaka:** *Yonasi 2:10*

10 Kansi mono, mono zola zitisa nge na bankunga, mono ta pesa nge makabu ya mbisi, mono ta sala mambu yonso ya mono tubaka. Mfumu Nzambi nge muntu ke gulusaka bantu.

G. **Yula bana:**

- Inki mutindu Nzambi sadisaka Yonasi? (Songaka mbisi kuluka yandi na mukedi)
I. Yimba "Nzambi ke ngolo!"

2. Nzambi tedimisaka Yesu na lufwa na ngolo na yandi.

A. **Tanga :** Matayo 12:40 (Yesu tubaka bandinga yai na ntwala ya lufwa na Yandi.)

40 Mutindu Yonasi vandaka na divumu ya mbisi ya nene ya masa bilumbu tatu mpimpa ti mwini, mutindu yo yina mpi Mwana-muntu ta vanda na kati ya ntoto bilumbu tatu mimpa ti mwini.

B. **Yula bana :**

- Na verse yai, Yesu tubaka nde Yandi ta vanda bonso Yonasi. Inki mutindu Yandi ta vanda bonso Yonasi? (Bonso Yonasi vandaka bilumbu ti mpimpa 3 na divumu ya mbisi, Yesu mpi ta vanda bilumbu ti mpimpa 3 na kati ya maziamu. Bonso Nzambi basisaka Yonasi na moyo na kilumbu ya tatu, Yandi mpi tedimisaka Yesu na lumbu ya tatu.)

C. **Songa inki me salama :** Bana sala theatre. Mwana mosi vanda Yesu, bonso yandi ke na lufwa na maziamu. Bana ya nkaka tanga "Kilumbu ya ntete, kilumbu ya zole, kilumbu ya tatu!" Ebuna mwana yina telema, bonso na lufwa.

D. **Yimba ti kina kusonga inki me salama :** "Nzambi ke ngolo!"

3. Ntumwa Paulo zolaka kuzaba ngolo ya Nzambi.

A. **Tanga :** Filipo 3:10a (Bana lenda tuba yo diaka.)

Mambu ya mono ke zola kaka yo yai: Mono zola zaba Kristo ti ngolo yina ya Nzambi tedimisaka yandi na lufwa.

B. **Yula bana :**

- Inki vandaka mambu zole Ntumwa Paulo zolaka kuzaba? (Yesu Kristo ti ngolo ya Nzambi ya tedimisaka yandi na lufwa.)

C. **Songa inki me salama :** Bana yonso na kimvuka sala bageste ya Ntumwa Paulo ke lomba ngolo ya Nzambi kusadisa yandi.

D. Yimba ti kina kusonga inki me salama: "Nzambi ke ngolo!"

MALONGI YA BAKRISTO:

Ngolo ya Nzambi--

ya basisaka Yonasi na divumu ya mbisi---ya tedimisaka Yesu na lufwa---

ya sadisaka ntumwa Paulo na kosalu na yandi---Ngolo yai lenda sadisa nge mpi na bampasi yonso.

Yindula diaka bampasi ya bana tangaka na luyantiku ya lesu. Vanda na ntangu ya lombilu sesepiyai sambu na bampasi yina, ti songa bana kulanda kaka kusamba na kati ya banzo na bo sambu Nzambi lenda sadisa bo.

Yimba: "Nzambi ke ngolo!" (Ton: Nzambi ke Mbote!)

KUBINGA NA YESU: Kana nge me tula ntima na Yesu ntete ve, zaba nde, Nzambi kele na ngolo kugulusa nge kana nge ta balula ntima na Yesu Kristo. Yoane 1:12 ke songa beto nde, « Kansi bantu ya nkaka yambaka yandi, bo ndimaka yandi mpi na ntima na bo Ebuna yandi pesaka bo kiyeka na kukituka bana ya Nzambi. » Mono ta vanda na kiese kusadisa nge kana nge ta kwisa solula ti mono. Yesu ta vanda na kiese kukitula nge mwana na yandi bubuyai.

Yimba: Kwisa na Yesu Kristo, Nge ata guluka! (No. 53, BK)

===

NSUKA YA BALESO YONSO 9

===